

ՀԱՅ ԱՐՎԵՍՏԻՆ ՆՎԻՐՎԱԾ ՄԻՋԱԶԿԱՅԻՆ ՍԻՄՊՈԶԻՈՒՄ

Սեպտեմբերի 12-ից 18-ը Երևանում տեղի ունեցավ հայ արվեստին նվիրված միջազգային երկրորդ սիմպոզիումը, որը կազմակերպել էին Սովետական Միության և Հայաստանի գիտությունների ակադեմիաները և ՀՍՍՀ ԳԱ արվեստի ինստիտուտը: Նրա աշխատանքներին մասնակցելու էին հրավիրվել Սովետական Միության և աշխարհի շուրջ 20 երկրների մոտ 200 գիտնականներ:

Սիմպոզիումի պլենարի ցիստը տեղի ունեցավ սեպտեմբերի 12-ին, ՀՍՍՀ գիտությունների ակադեմիայի նիստերի դահլիճում: Բացման խոսքով հանդես եկավ ՀՍՍՀ Մի-նիստերների սովետի նախագահի առաջին տեղակալ, գիտաժողովի կազմկոմիտեի նախագահ Ա. Մ. Կիրակոսյանը:

Սովետական Հայաստանի կառավարության անուանից ողջունելով սիմպոզիումի մասնակիցներին, ընկ. Ա. Մ. Կիրակոսյանը մասնավորապես ասաց, որ հայ արվեստին նվիրված միջազգային գիտաժողովը տեղի է ունեցում այն օրերին, երբ հայ ժողովուրդը հանդիսավորությամբ նշում է Ռուսաստանի հետ Արևելյան Հայաստանի միավորման 150-ամյակը: Բարեկամությունը մեր երկրի ժողովուրդների և առաջին հերթին ռուս մեծ ժողովրդի հետ հանդիսանում է մեր քաղաքական, տնտեսական զարգացման և մշակույթի առաջընթացի հիմնական նախապայմանը: Մեզ համար մեծ է այս գիտաժողովի ոչ միայն գիտական, պատմական, այլև մշակութային-հասարակական նշանակությունը: Այն վկայում է, որ ի տարբերություն նախասովետական տարիների, այսօր Հայաստանն է հայագիտության կենտրոնը: Միաժամանակ հայագիտությունը բուռն վերելք է ապրել նաև հանրապետության սահմաններից դուրս, հայ ժողովրդի բազմադարյան պատմությունն ու հոգևոր մշակույթը դառնում են միջազգային ավելի լայն գիտական շրջանների հետաքրքրության առարկան:

Հայ ժողովուրդը իր ողջ պատմության ընթացքում, այնուհետև ասաց ընկ. Ա. Կիրակոսյանը, միշտ հետամուտ է եղել աշխարհում ծնունդ առնող նոր գաղափարներին, հայացքը միշտ հատել է ժամանակի մշակույթի բարձունքներին, ձգտելով նրա հետ համաքայլ ընթանալ: Նա իր ինքնատիպ արվեստը երբեք չի կղզիացրել, չի պատսպարել, նրա դուները միշտ բաց է պահել միջազգային արվեստի բարեբար հոսանքների առաջ: Եվ, մյուս կողմից, հայ ժողովուրդը միշտ ձգտել է իր մասնակցությունը բերել

19*

միջազգային քաղաքակրթությանը, իր արվեստի լավագույն արտահայտություններն ի սպաս դնել համամարդկային մշակույթին: Հայագիտության առաջատար նյութերի՝ բանասիրության, պատմության և հնագիտության կողքին գիտական մեծ կշիռ է ձեռք բերում նաև արվեստաբանությունը՝ որպես գիտության ինքնուրույն բնագավառ: Հայ ժողովրդի գեղարվեստական մշակույթի ուսումնասիրությունը մեզանում ստանում է նոր ծավալ, նոր որակ: Այդ երևույթի հասարակական նախադրյալները խարսխված են այն մեծ վերափոխումների վրա, որ տեղի են ունեցել հայ ժողովրդի կյանքի վերջին վեց տասնամյակների ընթացքում: Հենց այդ վերջին տասնամյակներն էլ հանդիսանում են մեր ժողովրդի քաղաքական և հոգևոր վերածնունդի ժամանակաշրջանը:

Հայաստանի գիտությունների ակադեմիայի նախագահության անունից սիմպոզիումի մասնակիցներին ողջունեց ակադեմիայի պրեզիդենտ, ակադեմիկոս Վ. Հ. Համբարձումյանը: Նա մասնավորապես նշեց, որ մեր հանրապետության գիտությունների ակադեմիան հայ արվեստի ուսումնասիրության հարցերը համարում է հատուկ ուշադրության արժանի գործ: Այդ պրոբլեմների գիտական ուսումնասիրությունը նախ և առաջ անհրաժեշտ է պատմության ճիշտ ըմբռնման համար, այսօրվա արվեստի պրոբլեմների լուծման գործում միջնադարյան հայ արվեստի դերի գնահատման նոր ձևեր ու գաղափարներ առաջ քաշելու համար:

Սիմպոզիումի պլենարի ցիստն ավարտվեց ՀՍՍՀ ԳԱ ակադեմիկոս Բ. Առաքելյանի՝ «Հայաստանի արվեստի զարգացման անտիկ շրջանի մասին», Պ. Կունեյի (Իտալիա)՝ «Հայ միջնադարյան քաղաքաշինության մասին» և Ս. Պողոթեղովայի (Մոսկվա)՝ «Միջնադարյան գրքարվեստի պատկերազրույցային աղբյուրների հարցի շուրջը» զեկուցումներով:

Հաջորդ օրը՝ սեպտեմբերի 13-ին, սկսվեցին գիտաշրջանի մասնաճյուղերի աշխատանքները: Կարդացվեց ավելի քան 150 զեկուցում, որոնց թեման էր հին և միջնադարյան Հայաստանի մշակույթն ու արվեստը, միջնադարյան ճարտարապետությունն ու մանրանկարչությունը, ինչպես նաև հայ նոր և սովետական արվեստը:

Հին և միջնադարյան Հայաստանի մշակույթին և արվեստին նվիրված զեկուցումներով հանդես եկան Բ. Պիտրովսկին՝ «Սկյութները և Ուրարտուն» (Լենինգրադ), Գ. Արեշյանը՝

«Աուր-արաքսյան մշակույթի արվեստը» (Երևան), Ա. Խոջաշը՝ «Ուրարտական արվեստի ուսումնասիրության հիմնական փուլերը և խնդիրները» (Մոսկվա), Չ. Բառնեյը՝ «Նոր հայացք ուրարտական արվեստի վրա» (Անգլիա), Մ. Սալվինին՝ «Ուրարտական ազդեցությունը Արևելքում» (Հոմ), Գ. Տիրացյանը՝ «Ուրարտու և Հայաստան» (Երևան), Ն. Գարսայանը՝ «Վահագն վիշապաբաղ» (ԱՄՆ), Խ. Մուշեղյանը՝ «Հելլենիստական շրջանի հայոց թագավորների դիմաքանդակները» (Երևան), Ինչպես նաև Զ. Քարավելը՝ «Երուսաղիմի Սուրբ Հակոբ հայկական եկեղեցու քանդակազարդ դուռը» (ԱՄՆ), Ն. Ալեքաշվիլին՝ «Հայաստանի և Վրաստանի VI—VII և X դարերի մոնումենտալ քանդակագործության մեջ կոտորների պատկերման մասին» (Թբիլիսի), Ա. Ղանալանյանը՝ «Ճարտարապետության և քարարվեստի հուշարձանների արձագանքները հայոց բանաստեղծության մեջ» (Երևան), Լ. Ազարյանը՝ «Հայաստանի վաղ միջնադարյան կոթողների պատկերագրության մի քանի առաջնահամարությունների մասին» (Երևան), Վ. Է. Կյալմբաուերը՝ «Ավանդույթը և նորարարությունը Ջվարթնոցի հարդարանքում» (ՄԱՆ), Ս. Ղազարյանը՝ «Ահեղ դատաստանի» պոեմի մեկնաբանումը XVII—XVIII դարերի հայ կերպարվեստում» (Երևան), Ն. Թիկոբին՝ «Աղթամարի Սուրբ Խաչ եկեղեցու որմնակարները, պատկերագրությունը և բժը» (Ֆրանսիա), Պ. Մուրադյանը՝ «Հայ քաղկեդոնականների մշակութային գործունեությունը XI—XIII դարերում» (Երևան) և ուրիշներ:

Հայ միջնադարյան ճարտարապետության ուսումնասիրման բնագավառում մեծ ներդրում ունեն արտասահմանյան երկրների և հատկապես իտալացի գիտնականները: Եվ պատահական չէր, որ այդ մասնագետները ելույթ ունեցածների զգալի մասը հենց արտասահմանյան երկրների գիտնականներն էին, որոնցից Ֆ. Գանդոլֆոն հանդես եկավ «Հալ վաղ-քրիստոնեական ճարտարապետության մեջ ստրուկտուրայի և ֆունկցիայի կապերի հարցի շուրջը» (Իտալիա), Հ. Ղազանջյանը՝ «Հայկական մի քանի գմբեթների ստատիկ բնութագրում» (Իտալիա), Մ. դ'Օնոֆրիոն՝ «V—VII դարերի մի քանի հայկական պալատներ» (Իտալիա), Ա. Ալագո-Նովելլոն՝ «Հայկական հուշարձանները Հյուսիսային Իրանի տարածքում» (Իտալիա), Գ. Ուլուհոջյանը՝ «Հյուսիսային Իրանի հայկական ճարտարապետական հուշարձանների վիճագրությունը» (Իտալիա), Ա. Տեր-Հարություն-

յանը՝ «Ազգիտի հայկական ամրոցը» (Անգլիա), Գ. Բրուխնաուզը՝ «Չորրորդ Հայք պատմական նահանգի հայկական եկեղեցիներն ու վանքերը» (ԳՖՀ), Կ. Հ. Կլինգեմբուրգը՝ «Հայ ճարտարապետությունը գերմանական արվեստագետների լաբորատորիաներում» (ԳԴՀ) զեկուցումով, իսկ մեր համարապետությունից և Սովետական Միությունից հանդես եկան Սո. Մնացականյանը («Հայկական ճարտարապետության զարգացման միջնահիսկյան փուլը»), Մ. Հասրաթյանը («Թբիլիսիի հայկական միջնադարյան ճարտարապետության հուշարձանները»), Ա. Թորամանյանը («XIV դարի հայկական ճարտարապետական հուշարձանները Մոլդավիայում»), Կ. Աֆանասյանը («Հայաստանի ճարտարապետական համակարգների համաչափության մասին») և ուրիշներ:

Ի թիվս այլոց հայ միջնադարյան մանրանկարչությանը նվիրված հետաքրքիր զեկուցումներ կարդացին ԳԴՀ-ից Բ. Բրեմտիեը («Հայ մանրանկարչությունը ԳԴՀ-ի հավաքածուներում»), ԱՄՆ-ից Ա. Սանջյանը («Վալիֆորնիայի համալսարանի XIV դարի Կլանորի ավետարանի մասին»), Երևանից Լ. Խաչիկյանը («Կերպարվեստի հարցերը հայ միջնադարյան քարոզչություն և մեկնողական գրականության մեջ»), Լեհիգրադից Տ. Իզմայլովան («XII դարի հայկական մանրանկարչությունը»):

Գիտաժողովի մասնակիցները ուղևորություններ կատարեցին մեր հանրապետության տեսարժան վայրերը, եղան Էջմիածնում, Սարգարապատում, Գառնիում, Սևանա լճի մոտ, Իլիջանում, դիտեցին Էջմիածնի Մայր տաճարը, Ջվարթնոցի, Հոփսիսիմեի, Գալանների տաճարները, Գոշավանքի, Հաղարծինի, Գեղարդի վանքերը, Գառնիի հեթանոսական տաճարը և այլն:

Սիմպոզիումի աշխատանքն ավարտվեց սեպտեմբերի 18-ին: Նրա արդյունքներն ամփոփեց Հայաստանի գիտությունների ակադեմիայի արվեստի ինստիտուտի դիրեկտոր Ռ. Զարյանը:

Հայ արվեստին նվիրված միջազգային սիմպոզիումի աշխատանքին մասնակցում էին Հայաստանի կոմկուսի Կենտկոմի քարտուղար Հ. Մ. Ոսկանյանը, ՀԿԿ Կենտկոմի բաժնիների վարիչներ Յա. Ի. Խաչիկյանը, Ա. Ա. Մկրտչյանը, Լ. Պ. Մանասերյանը, կուսակցական, սովետական ղեկավար աշխատողներ, ստեղծագործական միությունների ղեկավարներ:

Հ. ՍԻՄՈՆՅԱՆ